

इवनिंग डोगरी न्यूज़ बुलेटिन

समे-18:15 Hrs

<><><><><><>

Headlines

- जम्मू-कश्मीर दा विशेष दर्जा परताने सरबन्धी प्रस्ताव गी लेइये विधानसभा च होए दे शोर-शराबे दे चलदे उसी स्थगित करी दिता गेआ।
- प्रधानमंत्री नरेंद्र मोदी होरें आखेआ ऐ जे सरकार सशस्त्र बलें गी सशक्त करने लेई हर संभव कोशश करोग।
- गृह मंत्री अमित शाह होरें आखेआ ऐ जे सरकार तौलें गै आतंकवाद कन्नै निब्बड़ने सरबन्धी नीति ते रणनीति गी लागू करोग।
- रियासी जिले च पेश आए दे इक शिड़क हादसे च 4 लोकें दी मौत, 2 घायल।

<><><><><><>

Assembly-JK

जम्मू-कश्मीर विधानसभा गी अज्ज दिन भरै लेई स्थगित करी दिता गेआ। जम्मू-कश्मीर दा विशेष दर्जा परताने बारै पारित कीते गेदे प्रस्ताव दे चलदे विपक्ष नै बड़ा मता रौला रप्पा कीता। इस प्रस्ताव गी कल उप मुख्यमंत्री ते नेशनल कांफ्रेंस दे नेता सुरिंद्र कुमार चौधरी होरें पेश कीता। इस प्रस्ताव गी ध्वनि मत कन्नै पारित करी दिता गेआ। जियां गै अज्ज सत्र शुरू होआ बीजेपी नेता सुनील शर्मा होरें इस प्रस्ताव खलाफ आवाज पुट्टी ते इसी असंवैधानिक करार दिता। केई सारे मिम्बरें सदन दे बिच्च बश्कार औने दी कोशश कीती। स्पीकर हुंदी हिदायतें पर किश गी मार्शल आउट कीता गेआ। सांसद इंजीनियर रशीद हुंदे भास ते लंगेट थ्वां विधायक होरें हिरासत च

रक्खे गेदे सियासतदानें गी रिहा करने लेई गलाया। विधानसभा च रोले-रप्पे दे मददेनजर स्पीकर होरें सदन गी पैहले 15 मिंटें लेई ते मगरा दिन भरै लेई स्थगित करी दिता।

<><><><><><>

Gurkha-Protest

जम्मू-कश्मीर दा विशेष दर्जा परताए जाने बारै विधानसभा च पारित प्रस्ताव खलाफ गौरखा समुदाय दे लोकें विरोध प्रदर्शन कीता। उनें उप मुखमंत्री सुरेंद्र कुमार चौधरी हुंदा पुतला फूकेआ। प्रदर्शनकारिएं जम्मू खिते गी बक्खरा राज्य बनाने दी बी मंग कीती। उंदा गलाना हा जे एहदे कन्नै उंदी अपनी सरकार बनोग जेड़ी उंदे भले सरबंधी फैसले करोग। जम्मू-कश्मीर गौरखा सभा दे अध्यक्ष करूणा छत्री हुंदी अगुवाई च सैकड़ां बद्दे लोकें जिंदे च महिला ते बच्चे बी शामिल हे, नै नेशनल कांफ्रेंस सरकार ते कश्मीर आधारित नेतृत्व खलाफ बरोध रैली कइडी। कल विधानसभा च दफा 370 गी परतिए बहाल करने बारे प्रस्ताव पेश कीता गेआ हा। सभा दे अध्यक्ष होरें आखेआ जे इस विशेष दर्जे गी परताइए एह लोक उंदे हक्क वापस लैना चाहंदे न।

<><><><><><>

BJP-Protest

भारतीय जनता पार्टी नै पुंछ दे मुख बजार च व्यापक बरोध प्रदर्शन कीता। एह लोक कल उप मुखमंत्री सुरेंद्र चौधरी हुंदे आसेआ दफा 370 गी परतिए बहाल करने बारै पेश बिल खलाफ विरोध-प्रदर्शन करा'रदे हे। पुंछ थ्वां संवाददाता अनुभव मिसरी नै जानकारी दिती ऐ जे बीजेपी नेता नै दावा कीता जे एह बिल असंवैधानिक ऐ। उनें आरोप लाया जे नेशनल कांफ्रेंस दी अगुवाई आहली सरकार लोकें गी गुमराह करा रदी ऐ। बीजेपी प्रवक्ता सुनील गुप्ता होरें इस बिल दी निंदेआ कीती। उनें आखेआ जे एनसी जम्मू-कश्मीर दे लोकें गी इस मामले पर गुमराह करा रदी

ऐ। भारतीय जनता पार्टी दे केई सारे कार्यकर्ता कट्ठे होइये उनें एनसी दी अगुवाई आहली सरकार खिलाफ नारे लाए। उनें विकास सरबन्धी मुद्दे पर ध्यान केंद्रित करने लेई आखेआ।

<><><><><><>

Smriti-JK

भारतीय जनता पार्टी दी नेता स्मृति ईरानी नै जम्मू-कश्मीर दा विशेष दर्जा बहाल करने बारे पारित प्रस्ताव पर सौआल पुट्टे। नमीं दिल्ली च मीडिया कर्मिएं गी संबोधित करदे होई उनें इंडी गठबंधन दे नेताएं थ्वां इस बारे सौआल पुच्छे ते आखेआ जे इयां बझोंदा ऐ जे ओह जम्मू-कश्मीर दे संविधान खिलाफ नमीं लड़ाई शुरू करा'रदे न। श्रीमति ईरानी होरें आखेआ जे एह लोक दलित, जनजातीय समुदाय ते महिलाएं दे हक्कें दी खिलाफवर्जी करा रदे न। कांग्रेस पार्टी थ्वां सौआल पुच्छे होई उनें आखेआ जे कांग्रेस की जम्मू-कश्मीर च आतंकवाद खलाफ रौं साफ नेई करदी। उनें आखेआ जे दफा 370 दे हटने मगरा आम नागरिकें दी मौती दे आंकड़े च 80 फीसद कमी आई ते 70 फीसद हिंसा दिएं घटनाएं च कटौती होई ऐ।

<><><><><><>

PM-OROP

प्रधानमंत्री नरेंद्र मोदी होरें आखेआ ऐ जे वन रैंक वन पेंशन गी लागू करने दा फैसला मते समें थमां चलदी आवा'रदी मंग ते अपने सैनिकें दे प्रति राष्ट्र दे आभार गी प्रगट करने दी दिशा च इक महत्वपूर्ण गैऽ ऐ। इस योजना दे अज्ज 10 बरे पूरे होने पर इक सोशल मीडिया पोस्ट च श्री मोदी होरें आखेआ ऐ जे एह पैहल उनें दिग्गजें ते साबका सेवा कर्मिएं दी हिम्मत ते बलिदान गी श्रद्धांजलि ऐ जेड़े राष्ट्र दी रक्षा आस्तै अपनी जान गी समर्पित करदे न। उनें आखेआ ऐ जे इक दहाके दौरान लक्खां पेंशनरें ते पेंशनर परोआरें गी इस योजना थमां फायदा हासल होआ ऐ।

प्रधानमंत्री मोदी होरें आखेआ ऐ जे गिनतरी थमां परे एह OROP योजना थेआर बलें दी भलाई-
बेहतरी लेई सरकार गी प्रतिबद्धता दर्शांदी ऐ।

<><><><><><>

OROP

केंद्र दी इक रैंक इक पेंशन स्कीम OROP गी 10 बरे होई गए न। एह स्कीम साबका फौजिएं गी
बरोबर पेंशन देने ते इस सरिस्ते गी पारदर्शी बनाने लेई लागू कीती गई ही। मंत्रालय दा गलाना ऐ
जे इस स्कीम तैहत इस बरे 30 सितंबर तगर 895 करोड़ थ्वां मती रकम बंडी गई ऐ। इस
स्कीम राएं 25 लक्ख थ्वां मते सशस्त्र बलें गी फायदा होआ रदा ऐ। इस योजना च इक्कै रैंक ते
बरोबर सेवा अवधि कन्नै पेंशनरी होने आहले सैनिकें गी बरोबर पेंशन थ्हांदी ऐ। भामें ओह कुसै
बी तरीक गी पेंशनरी होए दे होन।

<><><><><><>

Shah-Conference

केंद्री गृह मंत्री अमित शाह होरें अज्ज आखेआ ऐ जे आतंकवाद दा मुकाबला करने आस्तै सरकार
तौले गै आतंक रोधी नीति ते रणनीति लेइये औग। नमीं दिल्ली च राष्ट्रीय जांच एजेंसी आसेआ
आयोजित दऊं दिनें दे आतंकवाद रोधी सम्मेलन दा उद्घाटन करदे होई अमित शाह होरें आखेआ
ऐ जे पिछले 10एं बरें सरकार नै आतंकवाद खलाफ सख्त रवैया अपनाया ऐ। शाह होरें आखेआ ऐ
जे पिछले 10 बरें च आतंकवाद खलाफ लड़ने लेई मुख्य च इक मजबूत प्रणाली तैयार कीती गई
ऐ। उनें आखेआ ऐ जे 2006 थमां 2013 तोड़ी आतंकवादी घटनाएं च 70 फीसद कमी आई ऐ।
केंद्रीय गृह मंत्री होरें आखेआ ऐ जे आतंकवादी हमले ते उंदी साजिश मुख्य दे खलाफ रची जंदी

ऐ। उनें युवा अधिकारिये लेई खास सिखलाई दी लोड़ पर जोर भरेआ ते आखेआ जे उनेंगी नमीं तकनीके कन्ने लैस होना लोड़चदा ऐ।

<><><><><><>

Accident-Reasi

रियासी जिले च पेश आए दे इक शिड़क हादसे च 4 लोक मारे गए ते 2 होर घायल होए न। आकाशवाणी जम्मू संवाददाता दी रिपोर्ट मूजब इक लौहकी गड्डी शिड़क थवां रूलकिए हेठ डूंगी खाई च जाई पेई। एह हादसा रियासी जिले दे माहौर इलाके च पेश आया। ड्राइवर दा गड्डी पर काबू नेई रेआ ते ओह हेठ जाई पेई। त्रै लोके दी मौके पर गै मौत होई गई जिसले कि त्रै होर घायल होए। प्राथमिक इलाज मगरा उनेंगी रियासी दे जिला अस्पताल भेजी दिता गेआ जित्थे इक होर नै दम त्रोड़ी दिता। मारे गेदे लोके दी पंछान मंजूर अहमद, उंदी 10 बरे दी धीs उलफत जान। गुलाम मोहीद्दीन ते उंदे पुत्र बसीर अहमद दे तौर पर होई ऐ। एह त्रैवे रियासी जिले दी माहौर तहसील दे रौहने आहले न।

<><><><><><>

VP-Chath Puja

उप-राष्ट्रपति जगदीप धनखड़ होरे छठ पूजा दे ध्यार पर सब्बनें लोके गी बधाई दिती ऐ। इक सोशल मीडिया पोस्ट च उनें कामना कीती ऐ जे छठ दा ध्यार सब्बनें आस्तै सुख ते समृद्धि लेइयै आवै। उप-राष्ट्रपति जगदीप धनखड़ होरे सूर्य देव दी पूजा दे ध्यार गी शाश्वत परम्पराएं दे जशन दे कन्ने-कन्ने प्रकृति कन्ने स्हाड़े गूड़े रिश्ते दा प्रतीक दस्सेआ। उप-राष्ट्रपति होरे मेद जाहिर कीती ऐ जे छठी मात दा शीर्वाद देशै गी प्रगति ते समृद्धि आहली बकखी बदने च मार्गदर्शन करोग।



Railways- Special Trains

भारतीय रेलवे आसेआ यात्रियें दी सुविधा आस्तै कल्लै थमां 164 खास रेल गड्डियां चलाइयां जा'रदियां न। त्यौहार मनाने दे मगरा अपने-अपने घर परतौने आहले यात्रियें गी एहदा लाह हासल होग। अगले त्रऊं दिनें दौरान तकरीबन 476 रेल गड्डियां चलाने दी योजना बनाई दी ऐ। उत्तरी रेलवे, दिल्ली, हरियाणा, उत्तर प्रदेश, पंजाब, उत्तराखंड ते जम्मू-कश्मीर दे बक्ख-बक्ख स्टेशनें थमां देश दे बक्ख-बक्ख हिस्सें च तकरीबन 20 रेल गड्डियां चलाइयां जाडन। आकाशवाणी कन्नै खास गल्लबात करदे होई उत्तरी रेलवे दे मुख जनसंपर्क अधिकारी हिमांशु शेखर उपाध्याय होरें आखेआ जे रेलवे स्टेशनें थमां यात्रियें दे सुचारू तौर पर बाहर निकलने ते उनेंगी अगगे दा रस्ता दस्सने लेई रेलवे सुरक्षा बल ते स्वयंसेवियें गी तैनात कीता गेदा ऐ।



CBC-Kathua

सूचना ते प्रसारण मंत्रालय दे केंद्रीय जन संपर्क ब्यूरो आसेआ कठुआ दे टाउन हॉल च 2 रोजा फोटू प्रदर्शनी दा सरिस्ता कीता गेआ। एहदा सरिस्ता लोकें तगर पुज्ज बनाने आहले कार्यक्रम तैहत होआ। कठुआ जिला संवदाता प्रदीप शर्मा मूजब एहदा मकसद लोकें गी आपराधिक कनूनें, पोषण ते पर्यावरण दी हिफाजत बारै अवगत करोआना हा। इस कार्यक्रम च केई सारे अफसरें, अधिकारिएं ते मुकामी लोकें हिस्सा लैता। इस दौरान सब्बनें गी इनें विशें बारै व्यापक जानकारी दिती गेई। इस प्रदर्शनी दा उद्घाटन एडीसी कठुआ रणजीत सिंह होरें कीता। ओह इस मौके पर मुख परौहने दे तौर पर मौजूद हे। अपने संबोधन च एडीसी होरें प्रतिभागिएं गी अपील कीती जे ओह नमें आपराधिक कनूनें, जेदे च भारतीय न्याय संहिता, भारतीय नागरिक सुरक्षा संहिता ते

भारतीय साक्ष्य अधिनियम शामिल ऐ, बारै जानकारी लैन। प्रदर्शन च पोषण अभियान ते मिशन लाइफ बारै बी दस्सेआ दसाया गेआ।

<><><><><><>

NSG-Jammu

युवा सेवा ते खेड्ढें सरबन्धी मैहकमे दे सचिव सरमद हफीज होरें अज्ज मौलाना आजाद स्टेडियम जम्मू च आयोजित इक शानदार ते रंगारंग समारोह च 68में राष्ट्रीय स्कूल खेड्ढें दा उद्घाटन कीता। आकाशवाणी दे संवाददाता दी रिपोर्ट मूजब एहदे च मर्दे दी श्रेणी च जूडो-अंडर-17, वुशु फेंसिंग ते फुटबॉल दी प्रतियोगिता शामिल ऐ। देशै दे बकख-बकख हिस्सें थमां 35 टीमां हिस्सा लै करदियां न जिंदे च 350 एथलीट शामिल न। जम्मू-कश्मीर च इस चाल्ली दे कार्यक्रमें दी मेजबानी दे महत्व गी उजागर करदे होई सचिव होरें आखेआ जे इये नेह कार्यक्रम खेड्ढें गी बढ़ावा देने दे कन्नै-कन्नै सैलसफा गी बी बढ़ावा दिंदे न। इनें खेड्ढें च 4 जहार शा मते प्रतिभागी बकख-बकख प्रतियोगिता च मुकाबला करडन।

<><><><><><>

NITI-MSME

नीति आयोग ते सीईओ बीवीआर सुब्रहमन्यम होरें अज्ज आखेआ ऐ जे देशै आसेआ कीते गेदे कुल निर्यात ते लौहके, भलेआं लौहके ते दरम्याने दजे दे उद्यमियें दा तकरीबन 40 फीसद योगदान ऐ। अज्ज नर्मी दिल्ली च इक कार्यक्रम दौरान बोलदे होई सुब्रहमन्यम होरें एम.एस.एम.ई दी नकदी ते तकनीकें जनेही चुनौतियें पर लोs पाई। उनें आखेआ जे नीति आयोग इनें चुनौतियें कन्नै निब्बड़ने लेई इलेक्ट्रिनिक्स ते ऑटो कम्पोनेंट लेई इक सरिस्ता तैयार करने पर कम्म करा'रदा ऐ। देशै दे आर्थिक बदलाव बारै बोलदे होई सुब्रहमन्यम होरें आखेआ जे बुनियादी ढांचे ते

नकदी निवेश नै देश दी तरक्की च मती अहम भूमिका निभाई ऐ। उनें आखेआ जे औने आहले
बरे च मुख्य दी आबादी एहदी तरक्की गी बढ़ावा देग।

<><><><><><>